

Margrit Sprecher

e ses portrets d'emprima classa

■ (anr/vi) Ord las quatter «strias» che han mazzà 42 pazients fa ella puspè carstgauns. Ed ils stars nuncuntanschibels pren Margrit Sprecher giu dal podest en ses artitgels. Dacurt è cumparì il cudesch «Ungebetene Besuche» cun texts da la schurnalista grischuna Margrit Sprecher. Ella ha scrit onns a la lunga per la «Weltwoche»: portrets, reportaschas u rapports da dretgira. Las meglieras da questas contribuziuns sa chattan uss en il cudesch che Suhrkamp ha publicità.

Era sch'igl è reportaschas da schabetgs d'avant intgins onns, èn las coluras anc adina frestgas. Sprecher furma las pli precisas conturas da las persunas ch'ella portretescha. Il bler èsi prominents u persunas che stattan in temp en il center da la publicità. Quella glied mussa Sprecher d'ina tut altra vart che usità.

Chapir las assassinas

In fatg nunchapaivel dal qual ins sa regorda anc oz suenter diesch onns: I vegn a la glisch che quatter tgirunzas han mazzà a Vienna 42 pazients. Avant dretgira spetga il pievel engurd sin la sensaziun. Margrit Sprecher descriva en ses rapport la glied che persequitescha il process e ch'è trumpada quant «normalas» che questas dunnas èn.

Da l'autra vart dessegna ella las characteras da las quatter dunnas cun fins stritgs. Ins è sco lectur tuttenina en la situaziun ch'ins chapescha daco ch'ellas han mazzà. Lura illustrescha Sprecher era l'alleanza dals academichers, dals giurists e dals medis. Lezs èn leds da pudair dar la culpa a las tgirunzas ch'eran surtgargiadas cun la lavur en questa clinica. Là aveva la societad stgargià tut quels ch'eran betg pli d'enrà.

Claudia Schiffer

Era tar il starmodel Claudia Schiffer ha Margrit Sprecher fatg ina visita e guardà davos las curvas ammiradas. Chatta n'ha Sprecher nagut spectacular. Il fotomodel cun las meglieras pajas da l'ultim tschientaner è ina dunna che fa quai ch'ins spetga dad ella. Dad auters models renomads aud'ins dad excess, engaschaments politics e fermas personalitads. Schiffer – sco quai che Sprecher mussa ella – è ina dunna pulita, gentila e convenziunala. Exact quai ch'i dovra per rebatter il feminissem.

Maraton en l'Engiadina

Il maraton en l'Engiadina saja ina veritabla festa dal pievel, aud'ins per regla. La reportascha da Sprecher relatta dentant da la concorrenza per il meglier material, e da seniors che sa dostan cun fista sch'ina dunna emprova da passar sper els vi.

Ina specialitad da la schurnalista èn las finiziuns da las reportaschas. Ellas mettan adina si ina cruna a ses texts. Il lectur porta questa finiziun savens anc in mument cun sai sco il gust d'in bun dessert. Uschia finescha la reportascha dal maraton en l'Engiadina cun l'arrivada dals davos curriders en la finamira nua che nagin applaudescha. «Quai èsi pia stà. Gratular ston els a sasez. Gist uschia sco en la vita da mintga di.»

Margrit Sprecher: «Ungebetene Besuche».
Suhrkamp Taschenbuch 3023. Pretschi:
13.90 francs. Frankfurt 2000.